

Investigacion

— Capitulo 2 —

**Midimento di e Violencia
entre Pareha (IPV)****E preguntanan principal
y e sub-preguntanan***Skirbi pa: mr. dr. Alida 'Lily' Marval*

E di dos set di preguntanan di e seccion aki tabata 'amenaza' di e pareha

Menaza un hende, tambe ta un manera di mostra poder y di mostra kico e persona ey por haci cu su pareha pa oblig'e di obedece y hacie sumiso. E prevalencia di e parti aki a ser midi cu 7 pregunta cu mester a ser contesta cu SI of NO. E respondientenan a ser pidi pa contesta e siguiente preguntanan. Bo por bisa cu ta of tabata berdad cu, 1. El a menaza bo di hacibo dolor {dal bo of herida bo}, 2. El a menaza bo di haci un hende cu bo ta stima {bo mayornan, yuinan, rumannan of miembro di bo famia} dolor, 3. El a menaza di bandona bo of separa for di bo of divorcia bo, 4. El a menaza bo di mata bo si bo lag'e of divorcie, 5. El a menaza bo di mata un bestia di cas {pet}, 6. el a menaza bo di kita bo yuinan for di bo, 7. El a menaza bo di manda bo bek pa bo pais di origen?



Resultado di menaza di pareha

Di e 661 respondientenan, 133 {20,12%} a yega di experiencia un of mas forma di e abuso aki. Esey kier men cu e prevalencia di e forma di IPV aki ta cu di cada 5 respondiente un a yega di experiencia un forma di e abuso aki.

Mencionando e agresor

E respondientenan por a scoge entre e siguiente opcionnan: 1. Bo actual casa of pareha, 2. Un {ex} pareha, 3 tur dos, 4. Prefera di no contesta.

Binti ocho {28} di e repondientenan {21.05%} NO a indica e agresor. Un total di 52 respondiente {39,10%} a menciona nan actual casa of pareha como e agresor. 40 {30,07%} respondiente a menciona nan {ex} partner, 9 {6.77%} a menciona tur dos.

Ora a mezcla e resultado di e seccion di Control y esun di Menaza {crosstabulation} a resulta cu 366 {55,37 %} respondiente a experiencia un forma di abuso di control y of un forma di menaza, kier men cu un di cada 2 respondiente a yega di eperiencia un of mas di e formanaki di abuso di IPV.

Preguntanan tocante emocion y con e respondientenan a sinti tocante e preguntanan riba Control y Menaza

Investigacion basa riba ideologia feminista normalmente ta focus riba e sentimentonan y experiencianan cu e victimanan a biba y no solamente riba resultadonan cualitativo. Pesey a uza 5 sentimentonan cu a ser menciona, cu e respondientenan por a scoge pa expresa nan sentimiento, manera: berguensa, impotencia, miedo, y tambe cu nan ta haya cu ta normal of hustifica of mereci. Tambe, a duna e posibilidad di menciona un sentimiento di nan mes.

TABEL: Sentimentonan/Emocionnan tocante Control and Menaza

Sentimentonan/Emocionnan	anda	Aporas un tiki	Tin biaha si, sin biaha no	Un tiki so	Mas hopi	Total
	n%	n%	n%	n%	n%	N
Mi a sinti berguensa	33=30.56%	9=8.33%	17=15.74%	18=16.67%	31=28.70%	108
Mi a sinti impotente	29=26.61%	5=4.59%	13=11.92%	18=16.51%	44=40.37%	109
Mi a sinti miedo	29=25.89%	6=5.36%	14=12.50%	27=24.11%	36=32.14%	112
Mi a kere cu ta normal	64=62.75%	6=5.88%	23=22.35%	7=6.86%	2=1.96%	102
Mi a kere cu mi merece	80=80.00%	2=2.00%	14=14.00%	4=4.00%	0=0.00%	100

E Tabel aki ta mostra claramente cu e sentimiento mas negativo ta impotencia (68.81%), sigui pa miedo (68.75%) y sigui pa berguensa (61.11%).

Pero e tabel aki, tambe ta mostra cu e opcionnan: "mi a kere cu ta normal" y "mi a kere cu mi merece", a ser rechaza pa mayoria di e respondientenan es ta 62.75% y 80%. Loke ta remarcabel ta cu tog 1 di cada 3 y uno di casi 5 hende muhe ta kere cu e ta normal of cu nan a merec'e